

LIGJ
Nr. 9928, datë 9.6.2008

PËR SHËRBIMIN SHËNDETËSOR STOMATOLOGJIK NË REPUBLIKËN E SHQIPËRISË

(Ndryshuar me ligjet nr. 10137, datë 11.5.2009; nr. 50/2013, datë 14.2.2013; nr. 99/2024, datë 12.9.2024)

(i përditësuar)

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

KREU I
DISPOZITA TË PËRGJITHSHME

Neni 1

Qëllimi dhe fusha e zbatimit

1. Ky ligj përcakton rregullat për organizimin dhe funksionimin e shërbimit shëndetësor stomatologjik në Republikën e Shqipërisë.

2. Ky ligj zbatohet nga/ndaj personat/personave fizikë dhe juridikë, vendas ose të huaj, të cilët ushtrojnë veprimtari në fushën e shërbimit shëndetësor stomatologjik në Republikën e Shqipërisë.

Neni 2

Financimi i shërbimit shëndetësor stomatologjik publik

1. Në institucionet e shërbimit shëndetësor stomatologjik publik ofrohet falas shërbimi profilaktik dhe mjekues stomatologjik për:

- a) personat nga mosha 0 deri 18 vjeç;
- b) të sëmurët e shtruar dhe ata që trajtohen në institucione spitalore publike, për mjekime urgjence;
- c) kategori të veçanta individësh që, me ligje dhe akte nënligjore të veçanta, përfitojnë shërbim shëndetësor stomatologjik falas.

2. Shteti merr përsipër të mbulojë pjesërisht:

- a) shërbimin e urgjencave stomatologjike për moshat mbi 18 vjeç;
- b) shërbime stomatologjike në Departamentin e Stomatologjisë në Fakultetin e Mjekësisë;
- c) shërbime stomatologjike në institucionet stomatologjike publike.

3. Masa dhe mënyra e kontributit të shtetit për shërbimet e parashikuara në pikën 2 të këtij neni përcaktohen me vendim të Këshillit të Ministrave.

Neni 3
Shërbimi i urgjencës stomatologjike

1. Shërbimi i urgjencës stomatologjike ofrohet në:
 - a) institucionet publike shëndetësore spitalore;
 - b) institucionet publike shëndetësore stomatologjike ambulatorë.
2. Në ato institucione shëndetësore, ku nuk mund të ofrohet shërbimi i urgjencës, sipas pikës 1 të këtij neni, lidhen kontrata shërbimi me subjekte, që ofrojnë shërbim stomatologjik privat.

Neni 4
Shërbimi shëndetësor stomatologjik në institucionet arsimore

1. Shërbimi profilaktik, diagnostikues dhe edukimi shëndetësor stomatologjik ofrohen në të gjitha institucionet arsimore të nivelit të detyrueshëm.
2. Ministria e Shëndetësisë dhe Ministria e Arsimit dhe Shkencës nxjerrin udhëzimin e përbashkët për funksionimin dhe organizimin e këtij shërbimi në këto institucione arsimore.

KREU II
**INSTITUCIONET SHËNDETËSORE STOMATOLOGJIKE,
ORGANIZIMI DHE FUNKSIONIMI I TYRE**

Neni 5
Institucionet që ofrojnë shërbim shëndetësor stomatologjik

1. Shërbimi shëndetësor stomatologjik ofrohet nga:
 - a) institucionet shëndetësore stomatologjike publike;
 - b) institucionet shëndetësore stomatologjike private.
2. Mënyra e organizimit dhe e funksionimit të institucioneve shëndetësore stomatologjike përcaktohet me urdhër të Ministrit të Shëndetësisë.

Neni 6
Licencimi
(Ndryshuar me ligjin nr. 10137, datë 11.5.2009)

Veprimtaritë e institucioneve të shërbimit shëndetësor stomatologjik privat, të përcaktuara në këtë ligj, përfshihen në kategorinë II.6 të shtojcës së ligjit për licencat. Këto veprimtari licencohen sipas ligjit të licencave.

Neni 7
Personeli i shërbimit shëndetësor stomatologjik
(Shfuqizuar shkronja "b" e pikës 1 me ligjin nr. 50/2013, datë 14.2.2013)

1. Shërbimi shëndetësor stomatologjik ofrohet nga personeli:
 - a) mjek stomatolog;
 - b) Shfuqizuar;
 - c) laborant dentar.

2. Personeli i shërbimit shëndetësor stomatologjik e ushtron veprimtarinë në përputhje me rregullat e miratuara nga Ministri i Shëndetësisë.

KREU III

MBIKËQYRJA NË SHËRBIMIN SHËNDETËSOR STOMATOLOGJIK

Neni 8

(Ndryshuar me ligjin nr. 50/2013, datë 14.2.2013; me ligjin nr. 99/2024, datë 12.9.2024)

Mbikëqyrja për verifikimin e respektimit të kërkesave ligjore, që burojnë nga ky ligj, në shërbimin shëndetësor stomatologjik kryhet nga struktura përgjegjëse për inspektimin në shëndetësi në përputhje me ligjin për inspektimin në republikën e shqipërisë.

KREU IV

KUNDËRVAJTJET ADMINISTRATIVE

Neni 9

(Ndryshuar pika 2 dhe shtuar pika 3 me ligjin nr. 50/2013, datë 14.2.2013; ndryshuar pika 2 me ligjin nr. 99/2024, datë 12.9.2024)

1. Kur nuk përbëjnë vepër penale, shkeljet e mëposhtme përbëjnë kundërvajtje administrative dhe dënohen:

a) shkelja e nenit 6, me gjobë 50 000 lekë dhe me ndërprerje të veprimtarisë deri në plotësimin e dokumentacionit, sipas legjislacionit në fuqi;

b) shkelja e rregullave të përmendura në pikën 2 të nenit 7 të këtij ligji, me gjobë deri në 50 000 lekë dhe, në rast përsëritjeje, me mbyllje të veprimtarisë.

2. Autoriteti përgjegjës për vënien dhe ekzekutimin e gjobave është struktura përgjegjëse për inspektimin në shëndetësi, në përputhje me ligjin për inspektimin në Republikën e Shqipërisë.

3. Masa e gjobës është dënim kryesor. Masa e ndërprerjes së veprimtarisë, sipas shkronjës “a” të këtij neni, është dënim plotësues dhe masa e mbylljes së veprimtarisë, sipas shkronjës “b” të këtij neni, është dënim kryesor.

Neni 10

Ankimi

(Ndryshuar me ligjin nr. 50/2013, datë 14.2.2013)

Ndaj vendimit të inspektoratit mund të bëhet ankim në përputhje me ligjin për inspektimin.

KREU V

DISPOZITA TË FUNDIT

Neni 11

Nxjerrja e akteve nënligjore

(Shfuqizuar fjalë në pikën 1 me ligjin nr. 10137, datë 11.5.2009)

1. Ngarkohet Këshilli i Ministrave të nxjerrë aktet nënligjore në zbatim të neneve 2 pika 3 të këtij ligji.

2. Ngarkohet Ministri i Shëndetësisë të nxjerrë urdhrat në zbatim të neneve 5 pika 2, 7 pika 2 dhe 8 pika 5 të këtij ligji.

3. Ngarkohet Ministria Shëndetësisë dhe Ministria e Arsimit dhe Shkencës të nxjerrin udhëzimin e përbashkët në zbatim të nenit 4 pika 2 të këtij ligji.

Dispozitë kalimtare

(Parashikuar në ligjin nr. 50/2013, datë 14.2.2013)

Organi ekzistues inspektues vazhdon të ushtrojë funksionin e vet sipas organizimit aktual deri në krijimin e organit të ri, sikurse parashikohet në ndryshimet e bëra në këtë ligj.

Neni 12

Shfuqizime

Ligji nr. 8167, datë 21.11.1996 “Për shërbimin shëndetësor stomatologjik”, i ndryshuar, si dhe aktet e tjera, që bien në kundërshtim me këtë ligj, shfuqizohen.

Neni 13

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Shpallur me dekreten nr.5784, datë 30.6.2008 të Presidentit të Republikës së Shqipërisë, Bamir Topi